

# Da la ruina da Guardaval a la Viafier da l'Alvra

Las vischnancas da Madulain, La Punt-Chamues-ch e Bever

■ **Madulain furma la pli pitschna vischnanca da l'Engiadin'Ota. Speravi la ruina da Guardaval cuntansch'ins il vitg dubel da La Punt-Chamues-ch. Chamues-ch è il lieu d'origin da l'erox legendar Adam da Chamues-ch.** A La Punt sa sparta il stradun che maina vers il Pass da l'Alvra. La proxima vischnanca, Bever, furma il punct da colliaziun da las lingias da viafier Tusaun-Bever-San Murezzan (averta il 1903) e Bever-Scuol (1913).

## Madulain

Vischnanca politica, circul Engiadin'Ota, district Malögia. La pli pitschna da las 11 vischnancas da l'Engiadin'Ota. Vitg a mantun situà a 1684 m a la riva da l'En sin in cugn alluvial da l'Ova d'Escha. 1137/39 *Madulene*, fin il 1943 tudestg *Madulein* (uffizial). 1806 93 abitants; 1850 63; 1900 54; 1950 77; 1980 94; 2000 180. Il 1979 han ins scuvert ina deponia da viglianas dal temp da fier tardiv. Sin in grip abrupt sur il vitg sa chatta la ruina da la fortezza da Guardaval, construïda enturn il 1250 da l'investg da Cuir, Volkard von Neuburg; en feud tar la famiglia Planta il 1377. Il complex è vegn bandunà en il 15avel tschientaner. Il 1543 è Madulain sa separà politicamain da Zuoz ed è daventà in vischinadi autonom. L'emprima menziun d'ina baselgia en il vitg datecha dal 1370. Enturn il 1510 è vegnida construïda la baselgia dal vitg en stil gotic tardiv; il 1554 è la vischnanca aderida a la reformaziun. La chaplutta bandunada da S. Baltramieu sa chatta al cunfin cun la vischnanca da Zuoz. Construcziun d'ina ovra electrica 1906 e da numerusas residenzas secundaras a partir dal 1970. Scolas a Zuoz. Meglieraziun generala 1982-97. Il 2005 lavuravan 48% da la populaziun cun activitad da gudogn a Madulain en il sector secundar e 25% en il sector terziar. A Madulain vegn discurrì rumantsch, tudestg e talian. Part da la populaziun da lingua rumantscha: 2000 22,1% / 42,8% (megra lingua / tuttas indicaziuns). *Constant Wieser*

## Guardaval

Il pli impurtant complex fortifitg da l'Engiadin'Ota, situà sin in sparun grippus al vest sur Madulain. In foss separa l'areal dal chastè da la muntogna. La tur principala quadrata a dus plaus, situada al vest dal complex, fa part da la substanza la pli veglia dal chastè; a quel è vegn agiuntà pli tard in mir da tschinta cun in plan irregular. A l'ost sa chattava in tract d'abitat da pliras parts ed ina stalla. En il chantun meridiun dal mir da tschinta existan restanzas d'ina tur da defensiun. Guardaval è vegn erigì enturn il 1250 sut l'investg Volkard von Neuburg sco center administrativ dals bains episcopals en l'Engiadin'Ota. A la fin dal 14avel tschientaner era il chastè la residenza dals chastellans episcopals, ils si-

gnurs von Planta da Zuoz, e serviva da post da duana. Impegnà da l'investg a l'entschatta dal 15avel tschientaner, è il complex vegn bandunà vers la fin dal tschientaner ed è alura i plaunsieu en decadenza. A l'entschatta dal 17avel tschientaner è Guardaval menziunà sco ruina; il 1937 han inizià las emprimas lavurs da restauraziun.

*Maria-Letizia Boscardin*


## Adam da Chamues-ch

Erox legendar dal 15avel tschientaner ch'ha cumbattì per l'indipendenza da l'Engiadin'Ota. Tenor Durich Chiampell duai il chastellan episcopal, resident sin il chastè da Guardaval a Madulain, avair persequit e torturà en maniera crudavla la gliueda da la val ed avair pretendì per spusa la figlia dad Adam da Chamues-ch. Quel duai avair assassinà il chastellan odià e destrui il chastè cun l'agid da ses cumpogns. Damai che Chiampell pretendeva d'avair enconuschì ils descendents dad Adam da Chamues-ch, pudess il minz da la legenda esser vardaivel.

*Martin Bundi*

## La Punt-Chamues-ch

Vischnanca politica, circul Engiadin'Ota, district Malögia, situada en il fund da la val, cun il center da traffic La Punt, construï lung la via a sanestra da l'En al pe da l'Alvra, e Chamues-ch, situà da la vart dretga da l'En a l'entrada en la Val Chamuera. 1137/39 *Campolouasto* (copia dal 15avel tschientaner), 1296 *Cambescasco*, 1244 *Ponte*, tudestg/talian *Ponte-Campovasto* (fin il 1943). 1850 232 abitants; 1870 289; 1900 245; 1950 223; 2000 660. Dal temp medieval fin il 1851 ha appartegnì la vischnanca a la dretgira auta d'Engiadin'Ota. A partir dal 1543 ha La Punt furmà in vischinadi da Suot Funtauna Merla. Il 1370 vegn menziunada per l'emprima giada la baselgia da S. Andrea (cun clutger romanico) a Chamues-ch, reconstruï il 1505 da Bernardo da Poschiavo en stil gotic tardiv. Durant la restauraziun da la baselgia (1981) han ins chattà vasts relicts da mirs d'in portic romanico cun picturas goticas. Il 1561 è vegnida introducida la reformaziun a La Punt ed il 1680 han ins erigì ina baselgia filiala en stil baroc (restaurada il 1974-75). Il 1560 ha Stefano Catani, tipograf auxiliar da Dolfin Landolfi, installà a La Punt l'emprima stamparia sin territori rumantsch. A partir dal 17avel tschientaner ha la famiglia Albertini laschà construï a La Punt pliras chasas signurilas. La vischnanca è vegnida destruida parzialmain dad auas grondas (1566, 1772 e 1843) e d'in incendi (1803). Sper il traffic da sauma e l'agricultura han ils abitants da La Punt chattà gudogn en l'emigraziun artisanala tempriva ed en ils servetschs mercenars. Il traffic da martganzia e da persunas sin la via charrabla da l'Alvra, construïda il 1865, ha effectuà in svilup economic



Bever vers il Piz Bernina. Maletg da ca. 1835.

ch'ha durà fin a l'avertura da la lingia da viafier Tusaun-Bever-San Murezzan il 1903 e Bever-Scuol il 1913. Suenten il 1960 ha La Punt chattà access a l'industria turistica da l'Engiadin'Ota. Al nord da Chamues-ch ed a La Punt/Arvins è vegnidas construïdas dapi alura numerusas abitaziuns e chasas da vacanzas. Las duas parts da la vischnanca èn oz praticamain creschidas ensem. Dapi ils onns 1970 han ils numerus immigrants e pendularis dal vitg (2000 53%) modifitgà la structura demografica. Part da la populaziun da lingua rumantscha: 1941 68,5%; 1980 41,5% (lingua materna); 2000 20,6% / 47,7% (megra lingua / tuttas indicaziuns).

*Constant Wieser*

## Funtauna Merla

Il num designescha in spelm cun funtauna in vischinanza da Las Agnas da la vart sanestra da la Val da l'En tranter Bever e La Punt-Chamues-ch. Attestà per l'emprima giada il 1283. Funtauna Merla separava oriundamain las duas plais da l'Engiadin'Ota. Suenten la divisiun dal cumin d'Engiadin'Ota (1438), ch'è però restà ina dretgira auta, furmava Funtauna Merla il cunfin tranter las duas novas giurisdicziuns da Sur e Suot Funtauna Merla, cumpetentas dapi il 1462 (Brev dals tschintg sigils) era per conflicts civils tranter partidas dals dus cumins. La noziun Plaiv vegn duvrada anc oz per designar la part inferiura da la val. Cun l'introducziun dal nov urden giudizial il 1851 n'era Funtauna Merla betg pli in cunfin politic-giudizial ed ha pers s'impurtanza. En occasion da la correcziun da l'En (1856) han ins minà il spelm da la funtauna per gudagnar crappa per la construcziun dal rempar. *Ottavio Clavuot*

## Las Agnas

Anterior abitadi situà tranter Bever e La Punt-Chamues-ch al cunfin da las duas dretgiras da l'Engiadin'Ota, Sur- e Suot Funtauna Merla. 1462 *allas Agnas*, tudestg *Die Au*. Las Agnas eran il lieu da dretgira criminala da l'Engiadin'Ota sco era in lieu da recrutaziun e da susta. Tar l'ustaria veglia vegniva tegnì cumin mintga dus onns. Sco lieu da scuntrada furmava quest'ustaria il center da l'Engiadin'Ota. Suenten l'incendi dal 1726 è ella vegnida reconstruïda ed è daventada in lieu da divertiment cun sala da bigliard e da bal. Il 1816 è sa reunida qua l'emprima loscha grischuna da framasuns (L'intimité parfaite). Ils stabiliments èn vegnids duvrads la davosa giada a l'entschatta dal 20avel tschientaner sco piazza da fier e bain puril. Els èn vegnids demolids il 1929. *Ottavio Clavuot*

## Bever

Vischnanca politica, circul Engiadin'Ota, district Malögia, cun Spinass a l'entrada dal tunnel da l'Alvra. 1139 *ad Bevero*, fin il

1943 tudestg *Bever* (uffizial). 1850 181 abitants; 1888 151; 1900 407; 1950 227; 2000 631. Chats d'ina farcla da bronz dal temp preistorico e da restanzas d'abitadis dal temp medieval en la regiun da Curtins. Dal temp medieval tempriv fin il 1851/54 ha Bever fatg part da l'istorgia politica da la dretgira auta da l'Engiadin'Ota. La baselgia da S. Giachen, menziunada il 1370 ed ornada cun picturas da paraïd goticas (da ca. l'onn 1350), è stada ina filiala da Samedan fin il 1527 (edifizis novs 1501 e 1667, tur nova 1672). Reformaziun il 1552. A l'ost da Bever sa chattava l'abitadi da Las Agnas, mantegnì fin il 1929. Il 1903 è vegnida construïda la staziun da la Viafier retica a Bever ed a Spinass, il 1913 la lingia da viafier en l'Engiadina Bassa. A Bever predomineschan la masterganza e l'allevament da muvel. Las chasas istoricas en il center caracteriseschan la vischnanca ch'è vegnida schanegiada dal turissem da massa, perquai ch'ils abitants da Bever han refusà il 1971 in project exagerà e declerà la Val Bever sco zona da repaus. Bever è stada l'emprima vischnanca en l'Engiadin'Ota ch'ha scumandà il 1974 l'acquist da terren tras esters. La vischnanca ha survegnì il 1976 il premi da la Fundaziun svizra per la protecziun e la tgira da la cuntrada, il 1985 il premi da l'Uniuon svizra per la protecziun da la natira (oz Pro Natura). Il 1989 ha la vischnanca survegnì in center nov. A partir dals onns 1960 ha la gronda mobilitad da la populaziun (emigraziun ed immigraziun) influenzà la structura dal vitg. La part da la populaziun da lingua rumantscha è sa diminuida dad 81% il 1880 a 50% il 1941 (lingua materna) respectivamain a 18,9% / 45,3% (megra lingua / tuttas indicaziuns) il 2000. *Ottavio Clavuot*

## Pass da l'Alvra

Pass a 2312 m tranter Bravuogn e La Punt-Chamues-ch. Passadi impurtant oravant tut per il traffic da transit nord-sid sur il Bernina durant il 16avel tschientaner. L'Alvra aveva en general mo segunda prioritad, perquai ch' il traffic sa splegava principalmain sur ils pass pli al vest vers Clavenna; el serviva oravant tut a la colliaziun locala, als contacts cun la Vuclina (sauma da vin) ed als transports da sal da las salinas d'Alla en il Tiroi. In project d'alleanza, stipulà il 1451 tranter la Lia Grischa e l'Engiadin'Ota, menziuna ina cruscha sin il pass che sa chattava a Cruschetta (2236 m) da la vart da Bravuogn e che marcava il cunfin vegl tranter l'Engiadina e la Val d'Alvra. Il rapport d'ina delegaziun veneziana, ch'aveva traversà l'Alvra sut circumstanzas difficilas il 29 da december 1525, ha sveglià l'interess dals istorichers per il pass. Era il sculptur ed aurer florentin Benvenuto Cellini rapporta da sias stentas da traversar ils pass dal Bernina e da l'Alvra enturn ils 78 da matg 1537; la gronda naiv

aveva mess el e ses cumpogns pliras giadas en privel da mort. Da quel temp n'existiva nagin ospizi sin il pass. Pir pli tard è vegnida averta in'ustaria al Crap Alv. L'avertura ed il mantegniment da la via avevan da garantir ils vischinadis da Bravuogn e da La Punt-Chamues-ch. La convenziun da l'Engiadin'Ota cun Chamues-ch *de ruptura Albule* (1544) reglava oravant tut l'avertura dal pass durant l'enviern (11 da november-prim d'avrigl). La via da l'Alvra, exposita fermamain al privel da l'Alvra, aveva adina vegnì marcada cun lantinas. Ils vischins da Chamues-ch avevan il dretg d'ina taxa da passagi sco recompensa per il mantegniment da la via. Ins trasportava oravant tut vin, graun, ris, sal e fier sur l'Alvra. Grazia a las minieras a Bravuogn, a Filisur ed al Pass dal Bernina èn ils transports da minerals e metals sur il pass stads per part intensivs. Il 1548 ha la Frantscha installà in servetsch postal sin la ruta da l'Alvra-Bernina per garantir il traffic e commerzi cun Vaniescha; quest servetsch aveva augmentà l'attractivitat dals dus pass alpins. Lung la ruta da l'Alvra, a Cuir, Lantsch, Bravuogn e La Punt-Chamues-ch, è vegnids obligads viturins spezialis da garantir il servetsch postal franzos. Cun la construcziun da la nova via veneziana da S. Marc da Bergam a Murbegn (1593) è il traffic da transit puspè sa spustà per gronda part sin la ruta dal Spleia e dal Set. L'Alvra ed il Bernina han pers lur impurtanza. Tuttina è la via da l'Alvra vegnida utilisada e mantegnida regularmain. Il 1696 è ella vegnida tagliada en il Crap da Bravuogn ch'ins aveva stui sviar fin alura. Per sigliantar quel han ins duvrà per l'emprima giada en l'istorgia da la construcziun da vias en il Grischun pulvra naira. Il pedagi, fixà a Bravuogn il 1759, cumpigliava taxas per chargias da sauma, chars e schlieusas; l'Alvra era pia, almain per part, charrabel. Il 1864-66 è vegnida construïda la via actuala da Bravuogn a la Punt-Chamues-ch. Il 1903 han ins avert la lingia da la Viafier da l'Alvra (Viafier retica) cun ses bellezzas viaducts da crap, ses impressiuants tunnels a spirala ed il lung tunnel da Preda a Spinass en la Val Bever che fan part dapi il 2008 dal Patrimoni cultural mundial da l'Unesco.

*Martin Bundi*

## Lexicon Istoric Retic

Il LIR cumpiglia bundant 3100 artgels (geografics, tematics, artgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.



La Punt (davantvart) e Chamues-ch (en il fund) furmavan oriundamain dus vitgs separads.